

FRIISK TISING

Lasmootebles foon e Friisk Foriining – 1/2017

telefoon: 04671-6024154, iimail: info@friiske.de

Luise M. Clasen hålt as forwüset foon e ålereklub ap



35 iir lung wus Luise forwüset foon e ålereklub foon e Friisk Foriining. As har forgunger Ingwer Andresen aphül, häi Alfred Boysen Luisen besnâaked, di bântje as forwüset foon e ålereklub tu ouernaamen. Jütid drâawed e klub ham nuch önjt Dânsch schölj önj Deesbel. Deer schölj nuch for åles seelew sörid wârde. Arken mounne heet Luise ma heelp foon Friedel Petersen deerfor sörid, dât et åltens riklik kafe, kâage än büsche tu da ünlike drâawen jäif. Deer heet Luise dan uk åltens en latj tääl aw frasch ferteeld. Ouers ai bloots dât wus har apgoowe, tou tooche önjt iir mäaged di ålereklub uk en ütfluch, weer Luise for feroontuurdlik wus.

Frasch schriwen liird jü deerdöör, dât Alfred Boysen har 100 mark loowed häi, wan jü iinj iir lung da beruchte aw frasch schriif. Än dât giilj heet jü uk fungen.

Sunt hu iirnge drâawet ham di ålereklub nü åltens önjt Galerie Café önj Lunham. Dât heet di fordilj, dât huum ouders ham am e kafe än kâage kumere koon. Önjtwasche fäilt Luise har en lait tu üülj for di bântje. Dât as uk di grün deerfor, dât jü nü ai mör süfoole feroontuurdning ouernaame wal. Tääle wal jü ouers hâl nuch widerhaane bai da drâawen önjt Galerie Café ferteete. E Friisk Foriining wanscht Luise åles gous än säit foole tunk for dât gou stuk årbe önj da leeste 35 iir!

Di Frasche Rädj fäit 100.000 € mör projäktmadle foon e Bund

For 2017 heet di hühüülsütschus foon e tjüsche bundesdäi beslin, e stipe for da frasche foon 300.000 aw 400.000 € huuch tu seeten. Dât giilj schal deerfor brükd wârde, am dât årbe foon da frasche ferine nuch mör tu stipen än am naie projäkte tu finansiiren. Deerbai es et wichti, dât da frasche uk önj da näiste iirnge e seelew stipe foue, miinj Ingbert Liebing.

Di „höölebäär“ wörd söowenti

Foon Gary Funck

Önj e jülmounne fiird'r san 70ste iirdäi, di frasche schriwer än spräkemoun Erk Petersen. Än deerbai as e betiikning „schriwer än spräkemoun“ was ai nauenooch.

Önj arks kultuur jeeft et maning manschne, wat ma e struum swume. Än et jeeft sam, wat deer en lait apiinj gunge. Erk hiirt tu e tweede sliik. Äl sunt sin studântetid seet ´r ham in for san frasche mamenspräke. Hi schriif en uurdebök, uurdeliste än latje liirtääle.

Ouers hi heet uk åltens oudere e spräke baibroocht – än dât ai bloot önj en klaserüm unti bai en huuchschölj. Nâân, liifst braingt Erk frasch inönj da jarne, weer huum dât flicht ai gliks for möölik hålt. Önj Hüsem heet ´r iinjsen en frasch scheew önj e Heavy-Metal-tseene aw e wäi broocht, meeklik önj e krouf unti bai da diiljnaamere ine. Nuch diling, twunti iir lääser, wårt huum foon di iine än oudere „üülj-metåler“ aw frasch begröoted.

Erk heet åltens e spräke tu da manschne broocht. Deer haane, weer da manschne san - önj e krouwe, bai partys unti oudere geläagenhäide, weer manschne likes hâl tuhuupe sate. Deerbai gungt ´r åltens ma e tid än as äiwendäis ja besuners önj e sosjaale neetwärke aktiif än sörit deerfor, dât frasch deer riklik tu schüns as. Erk as en süüs for uurde än wiinjinge, wat knâap nuch huum kânt, än hi sörit deerfor, dât ´s wi unert följkaame. „Wat hiire foon enouder“ hât et südänji foon ham, wan hi iinjsen adjiis säit.

As schriwer as Erk en ferfooter foon maning tääle, wat ma e frasch müütologii tu douen hääwe. „We schan üs üüs äin müütologii schriwe“ sää´r iinjsen önj en interwjuu bai Friisk Funk. Än wörlklik...önj sin tääle wiitj huum uler sü nau, wat deer nü historie, wat följkens snääk as, än wat foon ham apfünen wörd.

Erk as uk en filosoof än aksjoonskunstner. Ik koon nuch gödj sin aksjoon ma latje awklaawere tänke. Irgendwat ma e täis foon en höölebäär stöo deeraw, absurd aw arken fäl. Döör e heelp foon Erkens grut fölischap luked et tut iinje foon e 90er iirnge än klaaw hiilj Nordfraslönj ma frasche awklaawere ful. Aw öfentlike hüschene, önj telefoonhüsinge, tooche, buse, äsw.

Flicht heet Erk wat foon en fraschen Hein Hoop, ouers önjt gehiilj as´r duch for älem hi seelew än fant ältens sin äine weege än kröög dät üt, wat ham wichti as. Än we frasche hääwe ma Erk huum, wat arks kultuur nüsi brükt: Än, wat uk iinjsen apiinj e struum swumt än deerma üusen kiming wat kläärer määget.

Deerfor seede we foole tunk, liiwe Erk, än san fernäid, dät dü bast as dü bast. Nuch iinjsen hartliken lukwansch tu dan 70ste iirdäi!

European Minority Film Festival 2016

Dät 6st Film Festival önj Hüsem gäng di 26.11.2017 ma en grut gala tu iinje. Ouer fjouer deege san fiiw ünlike spalfilme önj manerhäide spräke wised wörden. E kulturminister foon Slaswik-Holstiinj Anke Spoorendonk wus bai e gala, am e pris tu for e wunerfilm tu ouerdüünj.



Di baskische film „Amama“ köo dätbeer tooch e publikumspris än uk e jurypris ma tuhüs naame.

Ma önjt program wjarn uk maning kortfilme, wat döör et tuhuupeärbe ma et „Babel Film Festival“ aw Sardinien wised wärde köön. Di festivalsdiräktor Antonello Zanda wus uk tu

besäk önj Hüsem am en lait wat am sin festival tu ferteelen.

Et wjarn uk maning schauspaalere, produsänte än rejisöore foon da ainkelte filme tu besäk, am en lait wat ouer jar ärbe tu ferteelen.

Bai e gala jäif et dan livemusiik foon Annika Borsetto üt Ladinien, än foon e nordfrasche koor „Joyfull Voices“. Di doonsfloose „Move it up“ wus uk ma deerbai. We wjarn jarling wörlklik tufreese ma üüs festival än froie üs aw 2018, weer et wider gungt ma üüs European Minority Film Festival.

Wat ouers sü låpt

- Üusen älereklub drääwet ham widerhaane iinjtooch önj e mounne önj Lunham önjt Galerie-Café tu en meekliken eeftermadi ma forleesen, koordespaalen än snääk.
- Et stjör heet ham önjt fergängen ärbesiir soowen tooche tu meetinge drääwed, am da feriinsaktivitäate tu ploonen.
- Foon üüs lasmooteblees „Friisk Tising“, wat üüs lasmoote ma e pust foue, san önjt leest iir trii ütgoowe rütkiimen.
- Bai e Friisk Funk, Antenne Sylt än uk önjt interneet uner friiskforiining.podspot.de koon följt ältens foon moundi bit fraidi tisinge aw frasch hiire, finansiird foon e Foriining än spräägen foon Gary Funck.
- e Frasche Rädj seecht wi naie friiske stöögne for e „Musiikweedstrid 2017“. Bit tu e 31. marts as deer nuch tid, am musiik-stöögne as Mp3 intuschaken. Huum koon bit tu 500 € wune.

Termiine for 2017

- 14. januar Buume soomeln Risem-Lunham
- 03. februar Wunterfäst Fraslönj (kl. 19)
- 18. februar Biikeemfång (kl. 11)
- 21. februar Biikebränen Fraslönj (kl. 19)
- 16. marts Lasmootefersoomling (kl. 19)

Impräsum: Friisk Foriining, Friisk Hüs,

Süderstr. 6,
25821 Bredstedt/Bräist

ViSDP: Ilwe Boysen